

قصيدة جلال البحيرى الجديدة من خلف القضبان

القميص الكاروه

جوابك فى كم القميص الكاروه
يرفرف اليكى ويرمى السلام
اخاف ع القميص اذا فتشوه
يخاف القميص وينسى الكلام
واخاف من قميص مجرد مايطلع
وينفذ بجلده فى يحلف مايرجع
و يصبح مجرد قميص والسلام
و يمشى مطاطى فى وسط العوام
فى ينسى البطاقة ويدخل كمين
فى يغسل كرامته سيادة الأمين
ويعمل فى حقه حاجات مش تمام
فى يصرخ و يصرخ .. فى يصرخ لمين
وينده غيتونى يا عالم حرام
فى تشبع لياقته كفوف مخبرين
ويمكن كمان يفكوا الحزام
ويرجع قميصى المبجل سجين
ومتهوم بأنه عدو النظام
فى هكتب جوابك
يا يوصل لبابك
يا اما عليه العوض فى القميص
و حق القميص
.....
حبيبتى يا شابة
ياوردة محبة

بيكتب اليكى نزيل الليمان

بحيث العساكر

وراهم عساكر

وخلف العساكر عساكر كمان

بسلم عليكى

وبحضن عنيكى

يافايتة الاغانى فى نقش الحيطان

ياقافلة الموانى

وقافلة البيبان

فحاسبة اللى منك

و سادة الودان

يا كاتمة الحقيقة

وناكرة الادان

فكل اللى فاضل

مخالب غيلان

تدوس الامانى

وتحرق غيطان

وكل اللى باقى

أتين السواقى

وتعلب حرامى

ومالهُوش سنان

فكل اللى لازم

شوية ايمان

ليرجع نهارك

يعيدلك خضارك

ويحرق بنارك عشوش الجبان

سلامتك يا لوزة

يا اخر عجوزة

ولول صببية

فى عىن الزمان
ختاما بحبك
سجينا بحبك
و حرا بحبك
ومهما ان تعاندى
هحك كمان
رسالة حبيبك
سجين الليمان
حيث العساكر وراهم عساكر
وغير العساكر
عساكر حيطان

جالال البحيرى 6/27 طرة